

# SPR minta parti patuhi kod etika

BH-10/11/2007

**P**UTRAJAYA: Semua calon dan parti politik dalam pilihan raya kecil kerusi Dewan Undangan Negeri (DUN) Batu Talam pada 28 Januari ini diminta mematuhi Kod Etika Pilihan Raya yang mula diperkenalkan pada pilihan raya negeri Sarawak, Mei lalu.

Pengerusi Suruhanjaya Pilihan Raya (SPR), Tan Sri Abdul Rashid Abdul Rahman, berkata kod etika itu adalah garis panduan sewaktu menghadiri hari penamaan calon dan kempen untuk memastikan kelancaran pilihan raya.

"Ia garis panduan untuk mengawal tingkah laku supaya tidak menjejaskan pilihan raya," katanya ketika dihubungi semalam.

Antaranya, mewajibkan semua pihak mematuhi arahan SPR dan polis ketika berarak ke pusat penamaan

## FAKTA

### Kod Etika Pilihan Raya

- Kod Etika perlu dipatuhi semua calon, ejen pilihan raya, parti politik, pekerja dan penyokong.
- Tempoh penguatkuasaan dari hari penamaan calon hingga keputusan pilihan raya diisytiharkan.
- Selain Akta Pilihan Raya 1958, semua pihak perlu mematuhi akta berkaitan seperti Akta Hasutan 1998, Akta Polis 1957, Akta Rahsia Rasmi 1972 serta Akta Mesin Cetak dan Penerbitan 1994.

calon dan tidak boleh menggunakan alat muzik atau pembesar suara.

Difahamkan, peraturan dalam Kod Etika itu termaktub dalam Akta Pilihan Raya 1958, Akta Kesalahan Pilihan Raya 1954 dan Peraturan Pilihan Raya (Perjalanan Pilihan Raya) 1981.

Langkah mewujudkan Kod Etika hasil perbincangan semua parti politik dan pertubuhan bukan kerajaan (NGO) bertujuan memudahkan semua pihak, khususnya calon dan penyokong mengelakkan timbul masalah khususnya ketika kempen.

Selain mewajibkan semua calon mengadakan perhimpunan secara aman mengikut permit polis, calon dilarang membuat kecaman terhadap peribadi seseorang di khalayak ramai berdasarkan tohmahan, fitnah dan tuduhan tidak berasas.

Malah, calon dilarang melakukan perbuatan yang boleh menimbulkan kebencian atau permusuhan kaum, keturunan dan agama termasuk atas alasan untuk merayu undi bagi menyokong parti masing-masing.

Sepanjang kempen calon tidak dibenar menggunakan masjid, gereja, kuil, tokong atau tempat ibadat lain sebagai lokasi kempen, selain dilarang menggunakan bangunan awam tanpa kebenaran pihak berkuasa.

Calon yang tidak berpuas hati dengan keputusan pilihan raya atau mendapati ada pihak yang tidak mematuhi Kod Etika boleh mengemukakan laporan polis supaya siasatan boleh dijalankan.

SPR tidak mempunyai kuasa membuat siasatan dan pendakwaan kerana ia dalam bidang kuasa polis.